


V As. x. mach also/rech zwei aufrecht lini. e. f. vnd. g. h. eyn zehenteyl von der leng. a. b. hinder vnd for den seytten. a. c. vnd. b. d. Darnach zeuch des pustaben zwen kreuzzüg / den preytten dz der oben foren rür das. e. vnd vnden hünden das. h. aber den dünnen zug mach das er oben hünden rür das. g. vnd vnden foren das. f. Darnach schweyff die züg oben vnd vnden auß / das sie rüren die vier eck. a. b. c. d. vnd mach den halben Diameter des grösseren cirkels breyt eyn fünfteyl von der leng. a. b. damit schweyff die vier weyteren winckel auß / aber des kleineren Diameters cirkel mach preyt zwey dritteyl von des grösseren zugs preytten.
 Oder ender das. x. also/alle ding laß beleyben wie for/allein den dünnen strich richt oben vñ eyn halbtteyl von des pustaben preytten zug mer auß / so wirt das ober teyl kleiner vnd enger dan das vnder / vnd sicht anderst dann for. Wie das hernach ist aufgerissen.



X As. y. mach mitten in sein fierung in dem vnderem halbtteyl wie foren das. i. beschriben ist. Aber das ober halbtteyl spalt von einander / also das dz forder halbtteyl zwey dritteyl / vñ das hinder eyn dritteyl haben von des pustaben preytten zug / vñ leine ire bede teyl auß / also das ire ausschweyffung die zwey eck. a. b. reychen / vnd zu dem grossen cirkel / damit du aussen die weyten winckel ausschweyffst / des Diameter mach preyt der fierung felt neben dem pustaben / aber die Diameter der cirkel in die kleineren winckel mach ein yetlichen preytter dann der zug auß der selben seytten ist. Wie das hernach ist aufgerissen.